

Segirar empè da periclitar las rentas da l'AVS

Votaziun dal pievel dals 25 da settember 2016

DA LUCAS DEPLAZES / ANR

■ **Cunter l'augment da l'AVS per diesch pertschient è sa furmada ina vasta opposiziun. Quella ha preschentà ier a las medias ses arguments cunter l'iniziativa dal pievel che vegn en votaziun ils 25 da settember 2016.** Tenor «l'Assicuranza per vegls e survivents» (AVS) han en Svizra tuts il dretg sin ina renta da vegliadetgna u en situaziuns da survivent. La Constituziun federala pretenda che las rentas han da covrir commensuradamain il basegn d'existenza. La maioritad da las personas pensiunadas finanziescha ses custs da viver cun las rentas da las cassas da pensiun e cun quellas da l'AVS. Vitiers vegn il chapital da la terza pitga, uschè lunsch ch'in tal è vegnì accumulà. Tgi che n'arriva betg da covrir il basegn d'existenza po dumandar ina prestaziun supplementara (Ergänzungsleistung).

La renta na tanscha betg

Cun ina iniziativa dal pievel pretenda l'Uniun sindacala svizra in augment da las rentas da l'AVS per diesch pertschient. Tenor ils iniziants n'han las rentas da l'AVS betg suandà il svilup da las pajas, vitiers vegnan ils sbassaments massivs da las rentas da las cassas da pensiun. Cuntant persunas cun pajas bassas u mesunas hajan basegn d'in augment da las rentas da l'AVS. Ils 25 da settember proxim sto il suveran prender posiziun. Il cussegl

federal ed il parlament recumandan in na.

Vasta opposiziun

En vista a l'actuala refurma da l'urden da rentas sut il titel «Prevenziun per la vegliadetgna 2020» che vegn gist tractada en il parlament è sa furmada ina vasta alianza cunter l'iniziativa AVSplus. Da l'alianza – sut il lead da la pcd – fan part parlamentarias e parlamentarists da la pcd, da la pps, da la pld, da la pbd, da la pvl e da la pev. Er l'uniun dals seniors, l'Associaziun svizra dals patruns,

Economiesuisse, l'uniun purila e l'uniun d'artisanadi e mastergn refusan l'iniziativa.

Tgi paja?

Tenor *Yannick Buttet* (pcd VS) metta la nova iniziativa da la sanestra en privel l'avegnir da nossa AVS. Ella croda gist en il mument ch'il parlament tracta il project da prevenziun per la vegliadetgna che duai francar las rentas a lunga vista. Per *Toni Brunner* (pps/SG) caracterisescha l'iniziativa la vaira politica dals sindicats e da la Partida socialdemocratica. Quella

pretenda in augment da las rentas senza dir tgi che duai pajar quellas. Gia oz scriva l'AVS cifras cotschnas. A tgi che l'AVS stat a cor segirescha ella empè da la periclitar. Per finanziar l'augment pretendi fiss necessari in pertschient dapli contribuziuns per l'AVS, quai che muntass ina giada dapli in augment da las pajas e fiss tissi per l'economia.

Lorenz Hess (pbd/BE) fa attent als aspects negativs da l'iniziativa. Dus terzs da las persunas che retiran ina prestaziun supplementara na profitasian betg da l'iniziativa. En quest cas

vegniss reducida la renta supplementara. Quai muntass facticamain in sputament da las prestaziuns supplementaras tar l'AVS. Tut segund la lescha fiscala dal chantun pudess in augment da l'AVS muntar dapli taglia. *Kathrin Bertschy* (pvl/BE) fa attent a la cuntradiziun da l'iniziativa. En in mument ch'il dumber da las persunas che van en renta en ils proxims onns (baby boomers, augment da l'aspettativa da vita) saja quai fallà d'augmentar las rentas. Actualmain retiran 1,5 milliuns persunas ina renta da l'AVS. L'onn 2030 s'augmenta il dumber sin var 2,2 milliuns.

Bler simpatia per in augment da l'AVS

Tenor ina retschertga da Tarmedia sustegnan 60% l'iniziativa da l'Uniun sindacala svizra che pretenda in augment da las rentas da l'AVS per diesch pertschient. In gea a l'iniziativa muntass expensas supplementaras da var quatter milliardas francs l'onn. Ils iniziants vulan finanziar l'augment cun contribuziuns supplementaras dals lavurers e dals patruns sin las pajas da 0,4%.

In rapport da l'OECD fa attent che ina gronda part dals pensiunads en Svizra (23,4%) – ina tiara fitg bainstanta – stoppia viver cun rentas fitg modestas. En cumparaziun cun ils pajais da l'UE sa chattia la Svizra sin ina da las davosas posiziuns. Il studi da l'OECD prenda en consideraziun be las pajas e na resguarda betg la facultad.



Comité cunter l'augment da la AVS ha preschentà ses arguments ier a Berna. KEYSTONE